

e kore ano hoki e whakaaroa me kaua te mahi pani i te pere ki te rongoa whakamate. Ka mamao mai matou i nga waka, ka maranga te heera, a tae rawa mai ki te "Southern Cross." Ka hoki atu matou ko Bongard, mete o te kaupuke, ko nga tangata hoki hei hoe i te poti, me te mau pū ano matou, he whakahaere i te Pihopa. E pari mai ana te tai, otira kahore ano kia hōhonu noa te wai i runga i te toka e puta ai te poti; heoi ka mānu noa matou i waho, me te karaihe atu ki nga tangata i uta. Ka tae ki te $4\frac{1}{2}$ o nga hāora, ka puta matou i runga i te toka, ka ata hoe atu whaka uta. Katahi ka kitea e matou he waka e tere noa ana, kahore he tangata o runga. Te hoenga atu ki taua waka ra, ka kitea kua rite ano ki ta matou i maharahara ai. Tera, kei runga i taua waka, ko te tinana o Pihopa Patihana, he mea takai ki te kākahu Maori. Te hapainga mai o te tūpapakū ki runga ki te poti, katahi ka tangi te umere o uta. Kihai ia tetahi tangata i whakararu mai i a matou, engari, ka mahue taua waka i a matou, ka hoe mai etahi ki te tiki mai. I runga i te tūpapakū he manga nikau e takoto ana e rima nga pona i ponaia ki nga rau. Ka rapu noa hoki matou, he aha ranei te tikanga o tenei? Ka tirohia te ahua o nga tūnga ka kitea tona matenga kihai i whai takiwa i muri iho o te pānga o te patu. Ko te tinana kihai i ahatia, engari ko nga kākahu i tangohia; ko nga hū ia me nga tōkena i waiho.

Kua maha nga taenga o te Pihopa ki tenei motu i mua, ahua pai ana nga tangata, whakahoa mai ana. I ū ano matou ki reira i tera tau, kotahi hoki te hāora i takoto ai te poti ki te one i a te Pihopa e noho ana ki nga tangata i te kaainga. Ko te tikanga i era tau, ka hoe mai nga waka, ā kia toru, kia wha maero ki te moana, ka piki noa mai hoki nga tāngata ki runga ki te kaupuke; kahore rawa he matakū. Heoi ano ta matou i mohio ai, i putake ai ta ratou tikanga inaianei, kua ū pea tetahi kaupuke ki reira, kua tutū nga tangata o runga, kua patu i etahi o nga tāngata o te motu, na reira, tae kau atu tetahi pakeha ki reira i muri iho, ka patua. I mohiotia tenei ki nga mea e kitea ana, e rangona ana e matou ki nga wahi katoa e taea ana e matou."

Ka whitu nga ra i muri iho i tenei ka tangohia atu i roto i a matou a Rev. J. Atkin. No te aonga ake ka mate ko Tipene. Ko te tūnga o Hoani, he mea iti nei; i mahue hoki ia ki tona ake motu ki Mota; tera ano pea ia e ora ake.

2. He pukapuka ano tenei na Rev. J. Atkin ki tona whaea. Kihai i oti.

Hepetema 21, 1871.

E toku whaea,

Kahore e taea te whakaaro iho te nui o to matou pouri i to matou taonga nui ka riro nei. Ko to matou Pihopa kua mate i nga tangata o Nukapu te patu inanahi. I riro mai i a matou te tūpapakū, a tukua ana ki te moana inaianei. Ko ia anake